

**Ministarstvo pravde i uprave
Zakonodavno-pravna komisija**

Na osnovu člana 14. Zakona o izmjenama i dopunama Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 11/11) i člana 175. stav 1. Poslovnika Skupštine Kantona Sarajevo ("Službene novine Kantona Sarajevo", broj 25/10-Noví prečišćeni tekst), Zakonodavno -pravna komisija Skupštine Kantona Sarajevo, na sjednici od 15. jula 2011. godine, utvrdila je Prečišćeni tekst Zakona o objavljivanju propisa i drugih općih akata u "Službenim novinama Kantona Sarajevo".

Prečišćeni tekst Zakona o objavljivanju propisa i drugih općih akata u "Službenim novinama Kantona Sarajevo" obuhvata: Zakon o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 22/97), Zakon o izmjenama Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 9/04) i Zakon o izjenama i dopunama Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 11/11), u kojim je naznačen dan stupanja na snagu tih zakona.

Broj 01-05-21716/11
15. jula 2011. godine
Sarajevo

Predsjednik
Zakonodavno-pravne komisije
Esad Hrvačić, s. r.

ZAKON**O OBJAVLJIVANJU PROPISA I DRUGIH OPĆIH
AKATA U "SLUŽBENIM NOVINAMA KANTONA
SARAJEVO"
(PREČIŠĆENI TEKST)**

Član 1.

Zakoni, drugi propisi, opći i drugi akti organa Kantona Sarajevo (u daljem tekstu: Kanton) objavljuju se u "Službenim novinama Kantona Sarajevo" (u daljem tekstu: "Službene novine").

Naslovna strana "Službenih novina" sadrži grb Kantona Sarajevo i naziv "Službene novine Kantona Sarajevo", a ispod naziva: godinu izlaženja ispisanu rimskim brojevima i broj tih "Službenih novina", dan, mjesec i godinu izlaženja tog broja, kao i mjesto izlaženja te ISSN broj.

Na kraju "Službenih novina" obavezan je Sadržaj, sa naznakom organa koji je donio akt, nazivom akta i brojem stranice na kojoj je akt objavljen. Na zadnoj strani "Službenih novina", pored podataka o izdavaču, registraciji i administraciji i ostalih podataka koje mora sadržavati u skladu s propisima o štampanim medijima, navodi se i datum štampanja tog broja "Službenih novina".

Datum štampanja određenog broja "Službenih novina" označava se kao datum izlaženja tog broja "Službenih novina".

Član 2.

U "Službenim novinama" objavljuju se:

1. Ustav Kantona i amandmani na Ustav Kantona;
2. Zakoni, odluke, drugi propisi i opći akti koje donosi Skupština Kantona;
3. Poslovnik o radu Skupštine Kantona, poslovnici o radu radnog tijela Skupštine Kantona, odluke i zaključci radnog tijela Skupštine kada je to u njima određeno;
4. Uredbe, poslovnik o radu Vlade Kantona i odluke Vlade Kantona, kao i rješenja i zaključci Vlade Kantona kada je to u njima određeno;
5. Pravilnici, uputstva, instrukcije i naredbe, koje donose kantonalna ministarstva, kantonalne uprave i samostalne

- kantonalne upravne organizacije, u skladu sa propisima kojima se reguliše organizacija uprave;
6. Odluke ombudsmena, Visokog predstavnika za Bosnu i Hercegovinu, drugih organa i sudske odluke kada je to u njima određeno;
 7. Statuti i drugi akti koji imaju karakter općih akata preduzeća, ustanova i drugih pravnih lica, ako je zakonom ili propisom Vlade Kantona, kojim se uređuje odgovarajuća oblast, određeno da se ti akti objavljuju u "Službenim novinama";
 8. Oglasi, objave, dražbe, registracije, stope amortizacije i druge vrste objava, ako je to određeno zakonom ili propisom Vlade Kantona ili odlukom suda ili drugog ovlaštenog organa;
 9. Ispravke propisa i općih akata, ako tekst objavljen u "Službenim novinama", ne odgovara izvornom tekstu.

Član 3.

Statuti, odluke, drugi propisi, opći i drugi akti općinskog vijeća, odnosno Gradskog vijeća i njihovih organa i tijela i općinskog načelnika, odnosno gradonačelnika, objavljuju se u "Službenim novinama" kada je to određeno statutom ili drugim aktom općinskog vijeća, odnosno Gradskog vijeća.

Član 4.

Akti se objavljuju u "Službenim novinama" u izvornom tekstu koji je utvrdio organ, odnosno preduzeće ili ustanove koje su akt donijele.

Član 5.

Akte iz čl. 2. i 3. ove odluke odgovarajuća služba donosioca dužna je dostaviti u roku od osam dana od dana donošenja Službi za skupštinske poslove Skupštine Kantona koja ih dostavlja na objavljivanje.

Član 6.

U "Službenim novinama" akti se objavljuju prema redoslijedu utvrđenom u članu 2. tač. 1. do 6. ovog zakona, uz naznaku o čijim se aktima radi.

Ukoliko se u "Službenim novinama" objavljuju akti općinskih vijeća, odnosno Gradskog vijeća, općinskog načelnika, odnosno gradonačelnika, saglasno članu 3. ovog zakona, oni se objavljuju nakon redoslijeda akata iz stava 1. ovog člana, uz naznaku o čijim se aktima radi, i to prema slijedećem redoslijedu:

- akti Grada Sarajeva (akti Gradskog vijeća, akti gradonačelnika),
- akti općina na teritoriji Kantona, prema redoslijedu općina iz člana 4. Ustava Kantona (akti općinskog vijeća, akti općinskog načelnika).

Akti iz tačke 5. člana 2. objavljuju se nakon akata iz stava 2. ovog člana ili u posebnom prilogu koji je sastavni dio "Službenih novina".

Ispravke propisa iz tačke 9. člana 2. ovog zakona objavljuju se na kraju "Službenih novina", prije Sadržaja.

Član 7.

Poslovi izdavanja "Službenih novina" povjeravaju se ugovorom JP NIO Službeni list BiH (u daljem tekstu: Izdavač), kao poslovi od posebnog interesa za Kanton.

Poseban interes iz prethodnog stava ostvaruje se omogućavanjem da se bez naknade pristupa "Službenim novinama" objavljenim na WEB stranici Izdavača.

Redakciju, štampanje, administraciju i distribuciju vrši JP NIO Službeni list BiH.

Član 8.

Ovlašćuje se sekretar Skupštine Kantona Sarajevo da ugovorom sa Izdavačem uredi odnose iz stava 3. prethodnog člana, a naročito: o roku u kome se objava akata mora izvršiti, o redoslijedu objavljivanja akata, o obavezi da akti moraju biti potpisani i ovjereni, o načinu finansiranja usluga, o pretplati na

"Službene novine", o prodaji pojedinih brojeva pristupu bez naknade "Službenim novinama" objavljenim na WEB stranici Izdavača, kao i druga međusobna prava i obaveze.

Član 9.

Rukovodilac Izdavača je glavni i odgovorni urednik "Službenih novina".

Član 10.

"Službene novine" štampaju se naizmjenično na bosanskom jeziku, hrvatskom jeziku i srpskom jeziku.

Član 11.

Sekretar Skupštine Kantona stara se o objavljivanju zakona, drugih propisa, općih i drugih akata u "Službenim novinama".

"Službene novine" izlaze po potrebi, u skladu sa zahtjevom sekretara Skupštine Kantona.

Spisak zakona, drugih propisa, općih i drugih akata sa izvornim tekstovima tih propisa i akata dostavit će se Izdavaču radi objavljivanja u "Službenim novinama" u roku od osam dana od dana dostavljanja Službi za skupštinske poslove Skupštine Kantona.

Izvorni tekstovi materijala iz člana 3. ovog zakona dostavljaju se Službi za skupštinske poslove na jeziku konstitutivnog naroda na kojem treba da budu objavljeni u "Službenim novinama", radi štampanja u skladu sa članom 10. ovog zakona.

Izvorni tekstovi materijala iz stava 3. ovog člana, koje su donijeli kantonálni organi, prije dostavljanja Izdavaču, prevode se u Službi za skupštinske poslove na jezik konstitutivnog naroda na kojem treba da budu objavljeni u "Službenim novinama", radi štampanja u skladu sa članom 10. ovog zakona.

Akti iz stava 3. ovog člana objavljuju se najkasnije u roku od osam dana od dana dostavljanja Izdavaču.

Izdavač nema pravo da vrši ispravke ili lektorisanje izvornog teksta akta koji mu je dostavljen radi objavljivanja u "Službenim novinama".

Član 12.

Iznos godišnje pretplate na "Službene novine" određuje Izdavač, uz saglasnost Vlade Kantona.

Član 13.

Troškovi objavljivanja akata padaju na teret organa, preduzeća ili ustanove čiji se propis odnosno akt objavljuje u "Službenim novinama".

Član 14.

Novčanom kaznom od 500 do 1.000 KM kazniće se, za prekršaj kojim se nanosi šteta ugledu državne službe, ovlašteno lice u odgovarajućoj službi donosioca akata iz čl. 2. i 3. ovog zakona, odnosno ovlašteno lice Službe za Skupštinske poslove Skupštine Kantona ako ne postupi u skladu s rokom utvrđenim u članu 5. ovog zakona.

Za prekršaj iz stava 1. ovog člana kazniće se i rukovodilac odgovarajuće službe donosioca akta iz čl. 2. i 3. ovog zakona novčanom kaznom od 1.000 do 2.000 KM.

Član 15.

Novčanom kaznom od 500 do 1.000 KM kazniće se, za prekršaj kojim se nanosi šteta ugledu državne službe, ovlašteno lice u Službi za Skupštinske poslove Skupštine Kantona,

- ako ne postupi u skladu s rokom utvrđenim u članu 11. stav 3. ovog zakona,
- ako materijale za štampanje u "Službenim novinama" ne prevode na jezik konstitutivnog naroda na kojem treba da budu objavljeni u "Službenim novinama" (član 11. st. 4 i 5).

Za prekršaj iz stava 1. ovog člana kazniće se i rukovodilac Službe za Skupštinske poslove Skupštine Kantona Sarajevo novčanom kaznom od 1.000 do 2.000 KM.

Za prekršaj iz stava 1. tačka b) ovog člana kazniće se i rukovodilac nadležne službe donosioca akta iz člana 3. ovog zakona novčanom kaznom od 1.000 do 2.000 KM.

Član 16.

Novčanom kaznom od 1.000 do 2.000 KM kazniće se za prekršaj rukovodilac Izdavača:

- ako datum štampanja određenog broja "Službenih novina" nije označen kao datum izlaženja tog broj "Službenih novina" (član 1. stav 3),
- ako ne omogući da se bez naknade pristupa "Službenim novinama" objavljenim na WEB stranici Izdavača (član 7. stav 2),
- ako "Službene novine" ne štampa naizmjenično na bosanskom jeziku, hrvatskom jeziku i srpskom jeziku (član 10),
- ako akte iz stava 3. člana 11. ne objavi najkasnije u roku od osam dana od dana dostavljanja (član 11. stav 6),
- ako vrši ispravke ili lektorisanje dostavljenog izvornog teksta akta koji mu je dostavljen radi objavljivanja u "Službenim novinama" (član 11. stav 7).

Član 17.

Nadzor nad provođenjem ovog zakona vrši Ministarstvo pravde i uprave Kantona Sarajevo.

Član 18.

Odredbe ovog zakona odnose se podjednako na osobe muškog i ženskog spola, bez obzira na rod imenice upotrebene u tekstu zakona.

Član 19.

Stupanjem na snagu Zakona o objavljivanju propisa i drugih općih akata u "Službenim novinama Kantona Sarajevo", broj 22/97 prestaje da važi Privremena odluka o objavljivanju propisa i drugih općih akata ("Službene novine Kantona Sarajevo", broj 5/96).

Član 20.

Obaveza iz člana 11. stav 5. Zakona o izmjenama i dopunama Zakona o objavljivanju propisa i drugih općih akata u "Službenim novinama Kantona Sarajevo" počet će se izvršavati najkasnije u roku od tri mjeseca od dana stupanja na snagu ovog zakona.

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj dana 09.09.2015. godine, donijela je

ZAKON

O IZMJENAMA ZAKONA O OBJAVLJIVANJU PROPISA I DRUGIH OPĆIH AKATA U "SLUŽBENIM NOVINAMA KANTONA SARAJEVO"

Član 1.

U Zakonu o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst), u članu 14. u stavu 1. riječi: "od 500 do 1.000 KM" zamjenjuju se riječima: "od 750,00 do 2.000,00 KM", a u stavu 2. riječi: "od 1.000 do 2.000 KM", zamjenjuju se riječima: "od 1.500,00 do 4.000,00 KM".

Član 2.

U članu 15. u stavu 1. riječi: "od 500 do 1.000 KM" zamjenjuju se riječima: "od 1.000,00 do 3.000,00 KM", u stavu 2. riječi: "od 1.000 do 2.000 KM" zamjenjuju se riječima: "od 1.500,00 do 8.000,00 KM", a u stavu 3. riječi: "tačka b)" zamjenjuju se riječima: "alineja 2.", a riječi: "od 1.000 do 2.000 KM" zamjenjuju se riječima: "od 1.500,00 do 8.000,00 KM".

Član 3.

U članu 16. u stavu 1. riječi: "od 1.000 do 2.000 KM" zamjenjuju se riječima: "od 2.000,00 do 10.000,00 KM".

Član 4.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-24485/15
09. septembra 2015. godine
Sarajevo

Predsjedavajući
Skupštine Kantona Sarajevo
Sejo Bukva, s. r.



SLUŽBENE NOVINE

KANTONA SARAJEVO

Godina XXIV – Broj 11

Četvrtak, 14. marta 2019. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 27.02.2019. godine, donijela je

ZAKON

O IZMJENAMA I DOPUNI ZAKONA O OBJAVLJIVANJU PROPISA I DRUGIH OPĆIH AKATA U "SLUŽBENIM NOVINAMA KANTONA SARAJEVO"

Član 1.

U Zakonu o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst i 36/15), u članu 2. u stavu 1. tačka 7. mijenja se i glasi:

"7. Statuti i drugi akti koji imaju karakter općih akata preduzeća, ustanova i drugih pravnih lica čiji je osnivač Kanton";

Iza stava 1. dodaju se st. 2. i 3., koji glase:

"Vlada Kantona svojim propisom uređuje vrstu i postupak objavljivanja akata iz člana 2. ovog zakona i javnost rada organa Kantona, preduzeća, ustanova i drugih pravnih lica čiji je osnivač Kanton.

Vlada Kantona dužna je propis iz stava 2. ovog člana donijeti u roku od 60 dana od dana stupanja na snagu ovog zakona".

Član 2.

U članu 3., iza riječi: "Službenim novinama", stavlja se tačka, a ostatak teksta se briše.

Član 3.

Član 5. mijenja se i glasi:

"Član 5.

Akte iz čl. 2. i 3. ovog zakona odgovarajuća služba donosioca dužna je dostaviti u roku od osam dana od dana donošenja Službi za skupštinske poslove Skupštine Kantona koja ih dostavlja na objavljivanje".

Član 4.

Obavezuje se sekretar Skupštine Kantona Sarajevo da zaključi ugovor sa Izdavačem iz člana 8., a u vezi sa članom 7. st. 2. i 3. ovog zakona, u roku od 90 dana od dana stupanja na snagu ovog zakona.

Član 5.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-5247/19
27. februara 2019. godine
Sarajevo

Predsjedavajući
Skupštine Kantona Sarajevo
Elmedin Konaković, s. r.